

Organizacionnan priva a sali dilanti na interes di carnaval

Ciudadanonan a yuda carnaval!

Ministro y Comisario a worde muestra cu carnaval ta den crisis!

ORANJESTAD(AAN)-- Mientras gobernantenan mes no por a parce di a yega na e mediacion necesario pa saca Carnaval for di e situacion critico den cual el a cay, ciudadanonan a dicidi di bini cu iniciativa priva y manda un carta pa Ministro di Husticia y Comisario di Polis, pidiendo pa uni forza pa saca Carnaval for di crisis.

E accion dirigi tabata conta cu sosten di Asoma, Kiwanis Club of Palm Beach Aruba y e gruponan di Carnaval di Santa Cruz, John Flemming, Pa tin Pret, Sylvia Lourens, Caribe, Savaneta, Coastal, Centro di Bario Brazil, Elmar, Los Lago

Bay, Hospital y Italia 90.

Den e carta elogio a worde expresa pa e forma den cual Comisario Interino Rasmijn a tuma e promer pasonan necesario pa impone respet pa autoridad den e asunto di ponemento di trailers ariba ruta di Carnaval. E organizacionnan a indica cu nan ta conciente cu ta trata di un situacion cu Rasmijn a hereda y cu a para crece durante años te bira un estorbo di proporcion mayor.

Sinembargo e ciudadanonan ta di opinion cu por a evita e problema dor di cumenza prepara na debido tempo, especialmente si tene cuenta cu autoridad ta dispone di e in-

strumentonan di instrumentonan legal, kier meen APV, pa aplica den tal caso. Por ehemplo campamento na beach, cu semper antes tambe tabata un caos, awe ta bon reglamenta y ta anda sin problema mayor. Probablemente e trabau aki a worde subestima y pa falta di personal na e diferente departamentonan envolvi no por a worde atendi debidamente pa cual motibo mester a bay back na e sistema bieu.

E carta ta sigui muestra cu tambe e instancianan concerni ta di opinion, cu no a ser teni cuenta cu e interesnan di curazon di carnaval, cu ta e participantenan, carnavalistanan y musiconan.

Mescos ta conta pa Kiwanis y otro individualnan na kende un permiso pa bende articulonan a worde otorga y cu awor ta worde seriamente perhudica. Mescos ta trata di e grupo, cu a tene su mes na regla.

E instancianan ta muestra, cu no ta nan intencion di trata di busca falta ningun caminda, pasobra nan sa cu caminda, hende ta traha, eror ta worde cometi. Pero nan kier a yega na un solucion cu lo a sirbi Carnaval y Turismo y lo tene cuenta tambe cu participantenan.

A worde indica cu ora Aruba ta den crisis, semper el a sa di uni y a sali mas fuerte cu nunca. Carnaval ta den crisis awor y mester

busca un solucion, di cual lo no sali vencedor ni vencido, pero un Aruba unifica na interes di Carnaval.

Den e espirito aki un apelacion urgente y sincero a worde haci ariba e Ministro y Comisario pa yega na un formula pa sali di e problema y posiblemente regresa na e ruta original.

E loke a pasa mester sirbi como un shock therapy pa esnan cu no sa di mantene nan mes na regla y conhuntamente mester yega na un solucion satisfactorio y permanente pa e problema na bienestar di Carnaval y di aruba.

Pesey e gruponan a solicita un reunion pa asina nan por expone nan puntonan di vista.